

## Kart daa bzej Páblona' na' bseleen lao Títóna'

**1** <sup>1</sup>Nad' Pablo chzej' li', nak' wen llin che Chioza' na' nak' postl che Jesucristona', na' bselee nad' kwenche gaklen' ben'ka' ba wlej Chioza' gonlilall'gake'ne' na' gombia'gake' daa nak dii li daa chzajniin cho' goncho ka cheenile'. <sup>2</sup>Na' zoacho noncho lez to yel' mban zejli kani. Kana' zi' wx̄e wsiltie' yellioni, Chios, beena' biga chziye', bchebe' gone'n cho'. <sup>3</sup>Na' naa ba bllin lla, Chioza', beena' chisla cho' kwenche bi kwiayi'cho, chzenile' yog' ben' cho'a xtilleena' daa bene' lall' na' chyixji'a, kon ka wne' gon'. <sup>4</sup>Chzej' li', Tito, nako' ka dowalj xiin' daa nakcho toz chonlilall'cho Jesucristona'. Xacho Chioza' na' Jesucristona', beena' bisla cho' lao saaxya chechoka' kwenche bi kwiayi'cho, gaklenshgagake' li' na' gongake' ka so' mbalaz.

<sup>5</sup>Bkwaana' li' Crétana' kwenche wzeelo' koo x̄nezi daa bi biyollichō, na'ch kwejo' ben' koo lo na'gake' ben'ka' nakgake' txen nonlilall'gake' Crístona' to to yell, kon ka ba wnia' li' gono'. <sup>6</sup>Beena' gak lall' nee ben'ka' nonlilall' Crístona' chiya' wsa' che' wen kwenche bibi de ina ben' che', na' gake' ben' zoa toz xoolin, na' gonlilall' xiine'ka' Crístona', na' bi gakgakb' bi' mal ni bi' widenag kwenche bi wx̄a'gakb' cho'alao ben'. <sup>7</sup>Daa ngoo lall' nee xshin Chioza', chiya' gake' dowalj ben' wen, ben' bibi de ina ben' che', na' bi gake' ben' chep cha'lall', ni bi gake' ben' lok, ni weezo, ni wishagdil, ni ben' wzelall'. <sup>8</sup>San chiya' wi'e ga yigaan ben', na' yibaile' gone' dii wen, na' gake' ben' nyeen nyeenyi, na' ben' nxi nyech, na' ben' chnabia' kwiniin. <sup>9</sup>Chiya' gonlene' xtill' Chioza' daa nak dii li daa ba nsede', kwenche wtipe' lall' ben' yoblə daa wli' wseidle' legake' daa nak dii li, na' gone' ka shajle' ben'ka' nagake' aga kan' nakan.

<sup>10</sup>La' ben' zan inleeb ben' widenag zoa, ben' bizə chon chna, na'

ben' chziye', na' zangake' nakgake' ben' Israel, ben'ka' na yog'lolte ben' byoka' chonlilall'gake' Crístona' chiyal' sho'gake' sen daa le circuncisión. <sup>11</sup>Ben'kan' bi chiyal' we'cho latj wli' wsedgakile' ben', la' daa chzelall'gake' gongake' gan mechan' chdagake' to to yoo chli' chsedgakile' daa bi nak shli, na' chonllejgakile' do bxoontegake'.

<sup>12</sup>To ben' Creta, ben' chneyaa, wne' che ben' wlall che'ka': "Ben' Cretaki nakgake' ben' wxiye', ben' mal ga zeelo, ben' cheej chao ka nla' ka nte, na' ben' lia." <sup>13</sup>Na' dii likzə ka nakannan'. Daan, bsheshlengake' ka chiyali kwenche shajni'gakile' daa nak dii li daa ba wyajle'gake', <sup>14</sup>na' bich wzenaggake' che dill' golka' daa wdiljlall' ben' Israelka', ni bi wzenaggake' daa nazə ben'ka' chzoa ka'lə daa nak dii li.

<sup>15</sup>Ben'ka' ba nxi nyech yichjlall'do'eka' lao Chioza', ni daa cheej chaogake' ni daa chox'gake' bi chsej chllonan gag yichjlall'do'eka' dii nxi nyech. San ben'ka' nxinj yichjlall'do'eka' na' bi chajle'gake' che Crístona', bibi dii nxi nyech de lawe'ka', la' yichjlall'do'eka'ten lle' lla' dii mala', na' ni bi chao chdian legake' kat' chxinj chlengake'. <sup>16</sup>Nazgake' nombia'gake' Chioza', per diika' chongake' chili'n laogake' bi nombia'gake'ne'. La' nakgake' ben' mal ga wdelawin, na' nakgake' ben' bi chzoa dill', na' biga gakkzə gongake' daa nak dii wen.

**2** <sup>1</sup>Na' li' naa, bli' bsemi ben' daa nak dii li. <sup>2</sup>Bzajni ben' golka' gagake' ben' nsa' cheyin wen, ben' chidol' gap ben' legake' balaan, ben' nyeen nyeeniyi, na' soachechgake' gonlilall'gake' Crístona', na' gaggakile' ben', na' so sakgakile' bittez dii yen ile'gakile'. <sup>3</sup>Lekzka' nool golka' chiyal' gall illebgake' Chioza', na' bi gakkzə ben' wichitj dill', ni bi we'gake' latj gonzə ye! weezona' legake' gan, san chiyal' gongake' wen kwenche ile'i ben' ka chiyal' gongake'. <sup>4</sup>Na' wli' wsedgakile' nool xkwid'ka' gaki ben' che'ka' na' gaki xiine'ka', <sup>5</sup>na' gagake' ben' nyeen nyeeniyi, ben' bi nda' nchen dii mal, na' gap wwia loo yoo lillgake', gagake' ben' chiyesh'lallii, na' wlexj yichjgake' lao ben' che'ka' kwenche kono ine zban che xtil' Chioza' ni chegake'.

<sup>6</sup>Na' lekzka' goll bi' wew'ka' gagakb' bi' nyeen nyeeniyi. <sup>7</sup>Li'yen'an chiyal' wli'o chono' wen lao yog'lolte daa chono'. Na' wsa' cho' bash bal kat' wli' wsedilo' ben' na' benan do

yichj do lalloo, <sup>8</sup>na' wsako' wi'o dill' kwenche bibi de ina ben' cheyin. Na' yido'i ben'ka' chakzbani cho' daa bibi de gon inagake' checho.

<sup>9</sup>Bzajni ben'ka' yoo xanin wlexj yichjgake' lao xane'ka', na' gongake' ka yiyoolall'gake', na' bi yilliizgake' legake' dill'. <sup>10</sup>Na' bibi si' kwangake' che xane'ka', san soa do lall'gake' kwenche wli'gake' lao yog'lol daa chongake' nan le wen nak cho'a xtil' Chioza', beena' bisla cho' kwenche bi kwiayi'cho.

<sup>11</sup>Chioza' ba bliile' yog'lol ben' ye! goklen che'na' kwenche yilagake' na' bi kwiayi'gake'. <sup>12</sup>Na' ye! goklenna' daa bene' checho chli' chsedin cho' kwej yichjcho daa bi nak wen na' diika' chzelall' beli chenna', na' soacho yell-lioni nyeen nyeeniyicho, goncho ka chiyoolall' Chioza', na' gall illebchone', <sup>13</sup>shlak noncho lez illin lla choo lla xenna' yila' Jesucristona', beena' nak ben' choo ben' xen, na' nake' Chios checho na' bisle' cho. <sup>14</sup>Len' bzani ye! mban che'na' ni checho kwenche bisell bilee cho' lao yog'lol dii mala', na' bixis biyibe' cho' kwenche gakcho lall' nee na' selall'cho goncho daa nak wen.

<sup>15</sup>Dgan chiya! wli' wsedilo' ben', na' wtipo' lall'gake' gongake' ka cheeni Chioza', na' wsheshleno' ben'ka' bi chon wen, na' benan lega ben' nzoa Chioza'. Na' kono chiya! gonzi li' nakzi.

**3** <sup>1</sup>Bisa'lall'gake' wlexj yichjgake' lao ben'ka' chnabia', na' gakgake' ben' wizoa dill', na' segake' wneyi gongake' daa nak wen. <sup>2</sup>Bibi gon inazgake' che ben', san soalengake' ben' mbalaz na' gongakile' legake' wen, na' gakgake' ben' gaxjlall' lao yog'lol ben'.

<sup>3</sup>Lekzka' cho', kana' gokcho ben' bi nteyi na' ben' bi bzoa dill', na' gosh' wlall'cho lao dii mala', na' btakw bchej biya diika' bibayi beli chen chechona' cho', na' gokcho ben' xe'. Gokzbani ben' cho' na' gokzbani ljwellcho ganga. <sup>4</sup>Na' Chioza', beena' bisla cho' kwenche bi kwiayi'cho, bliile' cho' ye! ben' wen che'na' len ye! chaki che'na'. <sup>5</sup>Aga inacho daa bencho dii wennan' bisle' cho', san daa biyesh'lall'lile' cho'n. Na' bixis biyibe' yichjlall'do'chona' kwenche biyakcho ben' wen, na' Espiritu Santo che'na' bikobe' ye! mban chechona'. <sup>6</sup>Na' daa wit Jesucristona', beena' bisla cho', Chioza' bzoe' Espiritu Santo che'na' loo yichjlall'do'choki. <sup>7</sup>Na'

daa biyesh'lallile' cho', biyone' cho' ben' li ben' shao' kwenche goncho lez ikaacho yel' mbanna' nak zejli kani.

<sup>8</sup>Dillii nakan dii w<sub>x</sub>enlall'cho. Na' cheenid' gono' to dii byen wli' wsedilo'n ben'ka' chajle' che Chioza' kwenche segake' w<sub>n</sub>eyi gongake' wen. Diikin nakgakan wen na' gакlenan yog' ben'. <sup>9</sup>Bi gакguedlenzo' ben' ni che cho'a dill'ka' chyiljall'gake', ni daa nazgake' ben dii xozxtoe'ka' daa bi chiyoll chido, ni bi gакlebilol' ben'ka' chakguedz ni che leya' daa bzej dii Moiséza'. La' bi chaklengakan ben' na' bibi zak'gakan.

<sup>10</sup>Na' shi no chgoo ben'ka' dill' kwenche gакgake' choplə, chiyal' we'leno'ne' dill' bich gone' ka', na' shi ba gollo'ne' ka' to chop shii na' bi chzenagkze', bkwaschokle' ka'lə. <sup>11</sup>La' nezicho to kwinsen' chlliayi' kwine' daa nxinj yichjlall'do'ena' na' chontie' dii mala'.

<sup>12</sup>Kat' wselaa Artémaza' wa Tíquiconā' gana' zo', ben to dii byen yidwio' nad' yell Nicópoliza', la' na' ba nchoglallaa lljsoa' shlak te beo'ka' chbe' dii zaga'. <sup>13</sup>Goklengach ga zeelo gako' Zénaza', beena' nsed ley che Rómana', na'ch Apóloza'. Be'gake' daa chyallj chchingakile' kwenche koochgake' nez na' bibi iyalljgakile'. <sup>14</sup>Na' lekzka' ben'ka' nakcho toz chiyal' sho'logake' gongake' daa nak wen na' gакlengake' ben' shi bi chyallj chchingakile' kwenche ka' wgongake' llin daa ba nsedgake'.

<sup>15</sup>Yog'lol' ben'ki zoalen nad' ni chwapgake' li' chiox. Bwapgach chiox yog'lol' ben'ka' lle' na', ben'ka' chakgakile' cho' daa nakcho txen chonlilall'cho Cristona'. Chioza' gакlenshgue' yog'lol'-le. Ka' gakan.